

2. B. V.

DE

SUCCI NUTRICII
PER NERVOS
TRANSITU,

PRAESIDIO

JO. GOTHOFREDI BERGERI

D. Ordinis Medici Senioris, & Pa-
thologiae Prof. Publ.

Præceptoris sui venerandi,
dissert.

GEORG. ANDREAS AGRICOLA,
Ratisponenf.

A. D. XIX. JANUAR. A. clc lcc XCV.

H. L. 2. S.

VITEMBERGAE,

Typis CHRISTIANI SCHRÖDTERI, Acad. Typ.

THE NEW YORK
LIBRARY

OF THE
CITY OF NEW YORK

GEORGE WASHINGTON
UNIVERSITY

LIBRARY

DE
SUCCI NUTRICII
PER NERVOS
TRANSITU.

I.

Sic quidem vulgo persuasum fere est, nos in doctrinis, & cognitione rerum, bene ac sapienter regi autoritate intelligentium hominum, itaque prudentissime quodque & sentire, & dicere, & sequi, ut plurimis, ac doctissimis, idem maxime probetur. Neq; vero id injuria. Nam hi rationibus agunt, & fortissimis vinculis animos trahunt, ut vel ingratis impellant, quacunque velint. At enim uti hoc instituto, in ceteris, eos fortasse recte uti non inficier, qui in antiquitatis, & annalium memoria versantur, & monumentorum fide, scriptorumq; commemoratione, contenti esse debent, satisq; habere, si permulti eorum, iidemq; locupletes, sibi autores sint, quorum testimoniis rerum ex omni ævo repetitarum, cum ipsis per ætatem interfuisse, haud licuerit, enarrationem fulciant, ac tutentur: ita in naturalium rerum scientia, & medicina omni, longe est secus. Nullus fere annus est, qui non aliquid abditarum, retrusarumq; rerum, aut in suspicionem nobis adducat, aut studiose, diligenterq; investigatum, exploret, in promptuq; ponat, quod graves multorum atque inveteratas opiniones convellat; ut, si superes-

sunt, sui eos otii, quod in defensione harum rerum contriverunt, non poenitere non possit. Quo mihi etiam verius videntur excusandi Britannorum magistri, cum magnis aliorum judiciis adeo non feruntur, ut semper ipsa re, & ratione verum exquirant; sæpe numero multa nova, nec fando audita suspicentur; nonnunquam diversa præsentibus, contrariaque expectatis inveniant. Id quod de *succi nutriticii per nervos transitu* prædicare liceat. Quod quidem inventum etsi multi commenti loco habent, & suo eos ingenio, ac stylo abuti existimant, qui illud aut animadvertunt, aut scribunt: tamen idem principes Italiae medici laudant vehementerq; comprobant. Ut nec consilii, nec facti nos pigere possit, si rem, tot utriusq; nationis sermonibus percelebratam, quam possimus brevissime, videamus, dumq; affirmandi arrogantiam, & rursus negandi temeritatem vitamus, collatis in utramque partem argumentis, utra præferenda sint, bona aliorum venia, experiamur.

II.

Qua in re ut verborum litibus ne distringamur, prædictum velim, id potissimum hoc loco in disceptationem cadere: utrū liquor quis nervos interluat; ac si quidem interluat, corporine sit alendo, ut in partiū omnium substantiam imbibi, ac confici, & nutricari easdem possit? Quod quidem non illi tantum negant, quibus nervi nusquam omnino patent; sed etiam ii sibi difficulter persuaderi patiuntur, qui nervis subtiliorem duntaxat auram, sive aeream sanguinis partem, vehi; alimenti vero distributionem per arterias fieri, corpusq; sanguine, aut, sub hujus purpura latitante, lymph,

pha ali ac gliscere volunt. Atque horum omnium, ut a rationibus haud imparati sunt, palmarium argumentum duplici potissimum experimento infistit: quando nervos ligatos, nec supra vinculum intumescere, neque incisos eosdem quidquam humiditatis reddere observant; quæ tamen omnino futura, putant, si quadam succulentia, a cerebro impulsæ, & nutriticia universi corporis, scaterent. Quemadmodum inter nostrates vir celeberrimus, *Joannes Bohnius*, eam *Circul. Phys. progymn. 19.* sententiam impugnat.

III.

Sed uti fatear necesse est, ratiocinationes, ex ipsis rerum experimentis contextas, unum esse, idemq; efficacissimum, persuadendi genus: ita (pace quorumvis dissentientium dixerim) facile cuivis est intellectu, talem iisdem modum adhibendum esse, ne naturæ subtilitatem sola sensuum nostrorum infirmitate metiamur, cumq; ea inconspicua, particularum tenuitate sua in corpore munera exsequitur, in obviis mox humoribus oculos figamus. Enimvero egregie quidem natura tot amplorum & capacium canalium, ac ductuum manifestorum varietate, quibus, veluti rivulis, humores vehuntur, corpori est prospectum. Neque tamen ullo modo inficiandum est, angustiores adhuc superesse vias, quæ rebus subtilioribus iter transitusq; fit, & universa corporis fabrica omni ex parte conspiret. Inter quas quidem vias non immerito nervos referas; utpote quos impervios, ac clausos haud esse, sed viam subtiliori liquido aperire, etsi nunc nulla suppeterent argumenta alia: tamen ex ipsa horum compressione,

subinde facta, liquido, opinor, constaret. Hac enim corporis partes obtorpent, ad quas nervi illi compressi pertinent; magno fane, certoque documento, iter alioqui liberum, ac expeditum, eo temporis articulo esse obstructum. Qui simul ac sese explicarunt, pristina sentiendi movendiq; vis sensim restituitur; nec sine fornicationis sensu, ac dolore tali, ut eadem partes aculeis undique compungi videantur, quasi interceptum antea liquidum jam denuo motum pristinum recipiat. Neque vero liquidum illud, quod nervis decurrit, exiguum plane ac tenue esse, (ut quidem voluere, qui auræ instar id sibi mente finxerunt,) inde fortasse apparet, quod idem illud intra suos ductus in animantibus, recens jugulatis, aliquandiu resistat, & digitis utrinque districtum moveri loco, provolviq; queat. Id quod pereleganti experimento *Laurentii Bellini*, nec nimis sæpe, nec nimis valde nobis unquam laudati, didicimus. Nam qui canis adhuc vivi, aut vix dum enecti, sternum agili cautaq; manu diffuerit, & partem septi anticam a costis reciderit; tum nervum quendam phrenicum haud ita procul corde digitis alterius manus comprehenderit, & tantisper compresserit, dum sublato omni cum cerebro commercio, a motu suo diaphragma conquiescat; ac tum demum eidem nervo binos alterius manus digitos sub prioribus, nunquam remissis, semperque firmiter infixis, injecerit, eosdemq; quadam nervi compressione diaphragma versus duxerit, ac semel atque iterum, ac sæpius nervum ita distrinxerit: is quidem cernet oculis, diaphragma propter liquidum, e districto nervo in fibras septi motrices compulsam, reviv-

reviviscere quasi, tripudiatq; sua, & motus redintegrare. Ita tamen, ut, si superiori manu nervus arcte teneatur, atque alterius compressio alternis continueatur, omnis septi motus postremo insistat. Donec dimissa utraque manu, nervoq; sibi paullo momento relicto, atque eadem deinceps reiterata manuum, compressione, & stricture, nova liquidi supplementa, in superiore nervi parte conclusa antea, & impedita, in diaphragma immittantur, atque adeo ad intermissos motus idem aliquandiu exsuscitetur.

IV.

Qualem vero tam altum, editumq; nervorum constrictorum tumorem ab hoc liquido haud temere expectaveris, dum in memoriam revoces, sedatum, ac lenem illius cursum per tot infinitas tectasq; vias, & structuram præterea nervorum æstimes, quos ex pluribus cerebri filis medullaribus, suis propriis facculis, veluti quibusdam vaginulis, conclusis, intra communem quandam, firmamq; thecam membranofam compactos & constrictos, atque adeo ad intumescendum parum habiles esse, constat. At turgere tamen nonnihil ligatos nervos, & mihi confirmavit laudatus supra *Bellini*, & facto quisque periculo, experietur, modo vivi, aut occisi recens, animantis nervum vinciat, & manu vinculum injectum versus perstringat, seclusaq; communi theca, singulas fibras, alias post alias, seorsim inspiciat. In tantum enim illæ turgidulæ apparebunt, in quantum earum latera queunt distendi. Quod tametsi succum nerveum minus evincat, cum idem ex fluido aereo, quod vocamus, fibris nervorum comprehenso, gigni possit: omnem

*Diff. de ce-
rebr. cort.
c. 3.
Tr. de Urin.
& puls. &c.
ad Lector.*

omnem tamen dubitationem expediet incisio nervorum, quorum, adhuc calentium, medullā, ne extrinsecus liquorē esse arbitraris, rorido quodam & concretionis capace succo, ut præter Britannos, *Marcellus Malpighius*, & *Laurentius Bellini*, viri omni laudis genere abundantes, auctores sunt, turgere, eundemque, quod jam laudatus *Malpighius* in secto brachii nervo observavit, haud raro stillare, aut leni pressione emittere, experientia testatur. Quo quid evidentius succum nervorum oculis animisq; subicere possit, equidem non intelligo. Ut mirari omnino subeat, istis duobus experimentis, quæ hanc in rem a nobis commemorata sunt, tantum a quibusdam tribui, ut inde probabilem conjecturam succi nervorum nutritii, si non plane tolli, certe debilitari admodum, convellique existiment. Quanquam id notari velim, in animantibus majoribus feliciorei successu experimentum edi; contra atque in minoribus propter subtilitatem humoris, fibrarumq; nervearum, sensus acies interdum fallitur, quemadmodum plurimarum plantarum fibris nervosis evenire solet, ut iis, crescente adhuc planta, præcisus, nullus tamen succus exeat, etiamsi eā succo alibili ad partes nutriendas iter patet.

V.

Neque vero minus eandem sententiam confirmari ipsa cerebri, & nervorum, inde propagatorum, fabrica, ac constructione: facile perspiciet, quicumq; attenderit, molem illius universam quendam glandularum racemum esse, easq; non solum exteriorem cerebri ambitum, & corticem incingere ac complecti, sed interiora quoque, atque adeo ipsam spinam penetrare; ex

unaque parte arteriarum carotidum & cervicalium extremis finibus continuari; ex altera vero & interiore infinitas fibrulas, tenuissimas, candicantes, & depresse rotundas emittere; hasq; omnes vario ductu ac flexu ultro citroque ita implicari, ut fascium modo nexæ ac vinctæ, albam cerebri, & cerebelli medullam, veluti filis contextis grandem spongiam, efficiant; & tum circa utriusque fundum arctius coeuntes, in unumque veluti truncum collectæ, medullam elongatam effingant, atque hinc separatim exeuntes, & a meningibus in plures fasciculos, ac funiculos teretes, inter se junctæ & coagmentatæ, sub nervorum nomine in omnes omnino partes propagentur: hoc saltem discrimine, quod eorum alii e prædicta medulla, intra calvariam producta, egrediantur, alii vero longiori ejus progressionem, intra spinam coercita, per interstitia vertebrarum elabantur. Neque vero incredibile dictu videtur, istas medullares fibras, quas in glandulis cerebri, tanquam in fundo, radicibus omnes defigi, arteriarumq; finibus irrigari diximus, pervias esse, & subtiliori liquido apertas; cum in plantis etiam pateant, quæ succum nutrimentum vehant, angustissimæ fibræ, ac nervorum tubuli intra suas vaginulas molli quadam, & penetrabili, roscidaq; medulla, ex filaminibus cerebri ducta, referti cernantur.

V I.

Quod si a consimili constructione ad idem ministerii genus argumentari liceat: de descripta cerebri nervorumq; fabrica cum illustri Medicorum patri, *Malpighio Bellinog*, haud dubie fatendum erit, e sanguinea massa, jugi cordis impulsu per vias carotidum

dum & cervicalium ad cerebri glandulas transvecta, opportunitate pororum in continuatas fibras medullares secedere ac transmitti laticem quendam; quem admodum in ceteris glandulis, proprio excretorio vase donatis, observamus, ut diversus a sanguine per nervosum systema discedat. Enimvero non aereas tantum particulas sanguinis, ut multorum fert opinio, sed unâ defæcatissimam lymphæ partem, interiora cerebri pervadere, præterquam, quod ipsius cerebri, & spinalis medullæ perpetuus mador id ostendit, ut credamus: ipsa quoque ratio, multiplici experimento nixa, præscribit. Quippe cum constet, aquam in multo angustiores meatus, quam aerem, vel sponte se insinuare, vel vi compelli posse, atque adeo tubulorum angustias, aeri alioqui impenetrabiles, subire, ut dubitare non temere liceat, aquane subtilior sit ac tenuior aere. Nisi enim demus, aerem, firmo suarum partium nexu, arctisq; vinculis, sui discidio resistere, quem valde probabile est, oblongis corpusculis, quasiq; filaminibus flexibilibus, & ambientium pressura, lanuginis modo, inter se devinctis, ac impeditis, & velut in spirulas intortis ac convolutis, sed quæ exsolvere se semper contendunt, constare: fateri necessario debes, aeris corpuscula crassiora esse corpusculis aquæ, & quod inde effectum sit, etiam corpusculis aliorum plurium liquorum. Sed quoquo modo sese illud habet; id quidem liquet, aerem sub lymphæ tenuioris spolio subdivisum, facilius in cerebrum commeare, quam solitarium; in quo quidem haud leve momentum V. CL. *Guilielmus Cole* posuisse visus est. Neque in promptu est ratio, quare aer

*Nov. hypo-
thes. ad ex-
plic. febr. in-
term. sympt.*

Ec. 6. 2.

aer nullo lymphæ, cui permistus & intextus est, adju-
mento, in cerebrum invadere possit. Neque vero
tuto is solus in fibras cerebri commigraret, quin eæ
exsuccæ, ac rigidiores evaderent, & imperata dein-
ceps facere minus queant. Ac si medulla cerebri
ali augeri que debet, quid tandem rationi magis est
consentaneum, quam fibris ejus succum nutricium,
ex sanguine instillari: quas ingressus, quo minus & flu-
mine, a tergo insequenti, atque incitatione motuque
cordis ad cerebrum compulso, & hujus reciproco
motu, quem ab arteriarum, omnes ipsius anfractus
peragrantium, eosdemque pariter alluentium, & si-
nuum pulsatione capit, per universum corpus nervo-
sum diffuat, mihi vero haud apparet, quid impediat,
aut obstat.

VII.

Quibus argumentis adduci possumus, ut creda-
mus, illud, quod cerebrum rigat ac nervos, liquidum,
ex duum generum partibus coaluisse, altera rorida
& subactiore, concrescibili tamen lymphæ parte; al-
tera vero aerea atque elastica, quam aeris spirulæ,
quibus tota intus agitur humorum moles, suppe-
ditant: atque adeo ex conjunctione tali & conjuga-
tione purioris lymphæ atque aerearum particularum,
subtilem quendam, roridum, & elasticum liqvo-
rem, confici; quem si quis spiritus animalis, vel liquidi
nervei, succiq; nutritii nomine ducat appellandum,
per me certe liceat. Nihil enim attinet, alium quen-
dam æthereum, eundemque lucidum spiritum, quem
ex sanguine intra cerebrum quidam conflant, com-
minisci; quamvis idem sentiant, qui spiritus anima-

l. c. p. 308.

les, lucis ætherisve instar, nervorum fibras collustrare contendunt. Intelligimus enim, ætheris, omnia trajicientis ac pervadentis, materiam multo subtiliorem esse, quam quæ mollibus nervorum tenerisque fibris coerceri se patiatur. Præterea fatis est perspicuum, lucis perceptionem ex motu, & accessione radiorum ad eam oculi partem, quæ reticulatam ejus tunicam format, in instrumento sensu prædito effici. Neque vero moror, mediæ naturæ ætherem inter atque aerem elasticum, quasdam aeris subtiliores, nec elasticas particulas in cerebrum sese ingerere, & spirituum nomine per genus nervosum spargi, ac dividi; quemadmodum quidem recens nonnullorum opinio fert, de qua doctissimus *Bohnius* adeatur. Nihil enim est certius, quam omnem omnino aerem, tam tenuiorem, quam crassiorem, vi quadam elastica esse præditum; ejusmodi vero portionem aeris mediæ naturæ, nullo instructam elaterio, nusquam extare, atque adeo cum spiritu vitali, vel animali, æthereo lucidoque facere paria.

I I X.

Sed nimis longe, qua institi, via excessero, si eorum, qui a nobis dissident, placita retexere cuncta, & suo quodque loco excutere paremus. Suffecerit nobis, rei summam attigisse, cui per nos quidem licet, quo minus alii acquiescant. Interim hoc speramus fore, ut si res, eam in sententiam disputata, non omnium omnino animos, quod optare nimium fit, attrahat, studiaq; ad se alliciat; non defuturi tamen plane sint, qui illam sententiam, si non meliorem, nec pejorem tamen fortasse, inferioremq; ceterorum conjectu-

jecturis sint iudicaturi. Sequitur, ut exquiramus, utrum roridus ille succus, quo genus nervosum universum diximus perfundi, toti alendo corpori, augendisq; ejus partibus sit suffecturum, ut nutritii nomen tueri possit? Quod etsi prima fronte prodigio simile videri queat, perinde ac fieri fere solet, cum mens præjudicatis opinionibus obfessa, opus, quod sub sensus minus ceciderit, scrutatur: videamus tamen, adeone a ratione atque assensu nostro abhorreat, quemadmodum plerisque in mentem venit.

IX.

Atque, ut hinc proficiscar, si *Galenus* recte dixisse ^{3. de Tem-} omnibus est visus: Nihil nutrire posse, quin per ^{oper. 2.} omnia coctionis iustrumenta provectum, excremen- ^{1. Facult.} ta omnia abjecerit ac deposuerit: dubito, an præter ^{nat. 11.} nerveum liquorem sit omnino alius, cui proximi munus alimenti demandari jure & concedi possit. Quod *Galenus* pronunciatum tam rationi respondet, quam in naturam, & fabricam corporis plane convenit. Hoc enim cum ex crystallina ovuli materni lymphæ, in fibrulas, alius atque alius figuræ, compacta, totum concreverit, harumq; exiguos poros, id quod vires additurum est, ingredi, iisdemq; accrescendo extendere eas atque augere, vel restituere certe debeat, quantum continua expiratione decessit: illud profecto intelligitur, talem alimento præparationem adhibendam esse, ut non a fecibus modo perpurgetur, & nulla figurarum acie, aut asperitate importunum, sed etiam extenuatum valde & diffuum reddatur, id quod recreare partes debet; quo per omnem partium substantiam quoquo versum in intimos, &

minutissimos poros, immergi, ac mitissimi roris instar, partes imbuere, mutuoque complexu conjungi iis ac coagmentari possit. Quod cum permagni laboris foret, idcirco multa in nobis vasa machinata, est natura, viasque & instrumenta, quibus alimenta ante, quam in succum & sanguinem convertantur, in partes discerpantur, ac minutatim concidantur, tum a particulis, ad accrescendum ineptis, sejungantur, in liquoremque, primo lacteum, deinde in alium, & fluxum magis ac sincerum convertantur; postremo in succum nutricium, omnium multo tenuissimum ac limpidissimum, humorem liquecant.

X.

Ac primus quidem aditus est os. In hoc enim primum cibus acquirit præparationem quandam, qua dissimilibus exui partibus paulatim incipit, & suos odores nativos, ac sapes amittere, cum dentibus inciditur, & conteritur, ac salivæ, e plurimis ductibus, in os hiantibus, emergentis, aerisque, poros & intervalla cibi divellentium, vi colliquescit, crebraque lingvæ agitatione sursum deorsum volutatus, in molliorem massam dehiscit. Quo loco naturæ sapientiam in avibus miremur licet, quæ quia a dentibus imparatæ sunt, lapillos, hisque similia corpora dura devorant, & ventriculo, duobus crassis ac robustis musculis constructo, utuntur, ut molere queant & pinfere, quæ integræ in se ingurgitare coguntur, lapillis dentium vicem supplantibus. In ore igitur subacta quoquo modo ciborum massa a musculis lingvæ, faucium, & oesophagi, in unum hoc conspirantibus, clauso larynge summo, per operculum illius cartilagineum,

neum, five epiglottidem, veluti per subjectum quendam pontem, in gulam, per huiusque ductum in stomachum demum descendit. Cujus deinde tum adstringentis sese, tum remittentis commotione, præsertim vero alterno diaphragmatis motu & impressione, tanquam prelo injecto, novique menstrui, lymphæ puta, quam villi arteriarum gastricarum emittunt, accessu, & ministerio eliquata magis ac divisa, in substantiam, pulti, seu cremori similem, sensim, sensimque contabescit, ac pedetentim per pylorum in fistulam intestinalem exprimitur. Quo fit deinceps, ut cum interfusis novis humoribus, lymphæ nimirum, quæ ex racemo pancreatis, variisque glandularum aliis plexibus, quæ poris arteriæ mesaraicæ continentur, in ejus canalıs cavum exstillat; itemque cum illa lymphæ, quæ sale volatili oleoso, cujus magna liquandi vis est, foeta, bilisque nomine insignita; demumque cum aere, quo & ventriculus, & intestina inflantur: intime commixtus, justum idoneumque liquorem acquirat, ad universique corporis utilitatem porro elaboretur.

XI.

His enim liquoribus infecta, ac perfusa ciborum massa, dum per orbes intestinorum motu quodam horum undante ac placido, ab uno paulatim ad alterum devolvitur, non modo conficitur magis, attenuatur, atque exsolvitur, verum exprimitur etiam & percolatur pars ejus subactior in anfractuosos lactearum poros: detrimentis, quæ ostiolorum angustitiis arcentur, relictis, & deorsum ad ultima intestina sublabentibus. At chylus, illas in venas adactus, ulterius pro-

provehitur, ad conceptaculaque *Pecqueti* per glandulas mesenterii omnis corrivatur, ubi affusa ex lymphaticis inferioribus lymphæ diluta, compressionibus septi colliditur, & aortæ arteriarumque intercostalium iterata quavis diastole elatus, ductuum, in thorace propagatorum, gradibus ascendit, donec in venam subclaviam transcendat, sanguinisque alveo confusus, dextrorsum cor versus abripiatur, exquisito naturæ artificio summe perficiendus.

XII.

Quodsi quis chymicum naturæ opus sagacius scrutari velit, & modum quærere, quo chylum in sanguinem, & succum nutricium convertat: is facile admonebitur, eam continuo motu & agitatione particularum, ac percolatione, cohobationeque veluti chymica, uti; instrumentis quidem eò necessariis, ut partes chylum conficientes satis attenuentur, utilesque segregatæ ab inutilibus, idoneæ evadant, quæ vel vitali calore corpus perfundant, ac refoveant, aut in partium alimentum, ac naturam vertant, atque adeo nova corpora, firma & compacta constituent. Neque enim partes, quantum satis est, ali possunt, nisi cum commoda ab incommodis, quæque assimilari nequeunt, omnino segregentur; quod autem minus est incommodum, usque eo extenuetur, ut facile a consortione ceterorum humorum secedere, in omniumque partium poros distribui, & suis superficieculis, ut ita dixerim, partem nutriendam penitus amplecti, ac contactum firmiorem efficere possit.

XIII.

Itaque chylus a fecibus, alvo relictis, repurgatus, & gelatina alibili, sed minus adhuc subacta, minus subtili, minusq; sincera refertus, cum venis receptus veteri sanguini miscetur, & cordis atque articularum incitatione, nusquam remissa, iterum atque iterum ac sæpius circumagitur, & subsecuto excrementorum diversorum secessu, in minores portiunculas, limatas magis ac terfas, & plurimis insuper spiritibus erectas, dividitur; commutatione tacite paulatimque facta, minore quidem sui parte, pinguiore, saleque magis perfusa, spiritus, intus agentis, elaterio, ætherisque, omnia moventis per omnia vertigine abrepta, & excussa, rubore suffunditur, & purpuream speciem induit, motuque hoc suo vorticoso vitalem calorem tuetur: partem vero maximam in limpidiorem crySTALLINAMQUE lympham convertitur.

XIV.

Quo quidem in negotio non postremas pulmones feruat. Dum enim chylus, unaque humores, per venas reduces, atque in unam massam collecti, qui antea per articularum canales distracti, in his illisque partibus diversa spolia reliquerant, tot innumerabiles & perplexas vasorum pneumonicorum angustias rivulis tenuissimis transmittunt, necesse interea est, a motu pulmonum & ictibus aeris, vesiculas illorum, vasaque, his undique intertexta, pulsantis ac succutientis, minutius eos discerpi, in tennerrimosq; divelli globulos, atque permistos invicem accuratius, aliam plane figuram, alium situm, ordinem,

nem, & vigorem partibus suis acquirere; cum præfertim innexus eis ac illigatus vitalis aer, illa humorum attritione divisioneque a cohærentium particularum compedibus ac vinculis expeditus, liberiorque factus, majorem explicandi vim motumque acriorem singulis impertiat, ut confluentes denuo, & congregatæ in venam pulmonarem, atque a sinistra cordis auricula, ventriculoque sinistro rursus compressæ, & in aortam ejectæ, majori deinde contentione & circa suum axim volvi, in orbemque ire possint. Est enim sane animantibus interiore aeris ingressu opus, non solum, ut sua explicandi vi liquidi vitalis & machinæ totius corporeæ motum regat is atque excitet: sed etiam, ut æqvabilitatem cum aere externo, undique nos ambiente, & circumfuso, seruet ac defendat. Neque enim aere corpora animalium tueri se possunt, nisi aeri extrinsecus superficiem undecunque comprimenti, alia quædam vis ab interiori superficie per easdem quaquaversum lineas pari se virtute objiciat, æquisque viribus resistat. Quem tamen affirmare non ausim per tracheam illatum sanguine recipi, propterea, quod neque sensui pateat, neque ex pulmonum motibus deduci possit, aut ipsum aerem, aut partem ejus quandam in vasa sanguinis per respirationem derivari, ut vere sciteque

l. c. Bellini notat; neque etiam tanta ejus vis ac copia, quanta singulis respirationibus sanguini misceretur, utilis aut necessaria foret. Quin potius existimaverim, unâ cum chylo per lacteas sanguineasque fistulas spiritum colligi, in pulmonibus vero divisæ in minima humorum massæ penitus misceri ac interjici, ut irre-

quie-

quieto suarum spirularum motu, intestinum in illa, diffidium instauret, hocque vario & constanti particularum, mutuis ictibus confligentium, concursu & luctatione, per tubos arteriarum continuata, in his illisve tubulis aptos quibusque poris humores exuere, atque adeo alere, movere, sentire & gignere; uno verbo, actiones quasque suas obire animal possit. Nam maxima quidem humorum moles ductibus venarum, sanguinem vehentium, excipitur, atque ingens laticis chylosi, serosique copia in lymphaticas trajicit; dum particulae aliae, a centro sanguinis ad superficiem propulsae, in tubulos partium excretorios a latere ejiciuntur. Quo pacto aqua redundans atque effoeta, & falsis ramentis obruta, vel exhalatione & expiratione, vel crassioris humoris specie dimittitur, in partibusque aliis alii humores, integri pariter ac inutiles, a sanguine divelluntur.

XV.

Humor autem, qui venas lymphaticas iniit, non recta ad cor, more humorum, qui venis, sanguine, refertis, vehuntur, revertit; sed facto demum per glandulas itinere, quas globosas & conglobatas dictitant. De qua quidem re cum olim in mentem veniret dubitare, desii postea, quam dexterrima doctissimi Jo. Conrad. Brunneri manu, didici, immissum opera *Dissert. de gland. pituit. c. 2.* tubuli vitrei, per lymphaticum ingrediens vas mercurium vivum in ipsam glandulae substantiam penetrare, eamque, in partes pertenuis divisam, argenteo candore exornare. Pari modo injectum siphunculo atramentum, aliusve coloris liqvores alii, glandularum substantiam facile trajiciunt, suaque tinctura

*Adenogm-
phia curios.
p. 48.*

*Diff. de lym-
pha ortu &
lymphat.
vasculis.
l. c. p. 148.*

imbuunt, ac sæpe per alia, e glandulis egredientia, vascula redeunt. Harum igitur glandularum utilitas tanta videtur, (inquit Anton. Nuckius, diligentissimus vasorum lymphaticorum scrutator) ut nullum vas lymphaticum cursum suum absolvere possit, quin glandulas in transitu salutare semper necesse habeat. Uti potissimum apparet illis in locis, ubi nusquam glandula apparent, lymphatica tamen conspiciuntur; quæ per vias, Anatomicis nondum notatas, & ut ita dicam, cacas, glandulam aliquam (quam tamen ut propriam non obtinent) quarant, eructentque in eandem lympham, cum alia lymphæ aliunde prodeunte, commiscendam, & communi vase efferente, versus cisternam chyli, aliunde locum propellendam. Id quod fortasse dubitandi occasionem causamque dare possit, doctissimo viro, Georg. Gunth. Schelhammero, quum B. Th. Bartholinum secutus, lympham, quæ ex artubus re-
dundat, ulium cum glandulis commercium colere, atque adeo bono ullo commodoque advehi, pro eo jure, quo sui cuique iudicii in libera Medicorum re-
publica esse licet, adhuc negare maluit. Nam pedes, (pergit Nuckius) imo quilibet eorum digitus, sua obtinent vasa lymphatica, quæ compositis duobus, tribus, quatuorve ramificationibus, variisq; insulis, recta sursum tendunt, vasa venosa, sub integumentis associantia. Hæc porro, salutatis in itinere glandulis aliquot muscosis, glandes subintrant iliacas, ex quibus porro in chyli saccum cursum absol-
vunt. Eodem fere modo manus sese habent, ex quarum digitis lymphatica prodeuntia ramos componunt, variis insulis conspicuos, sub cute extensos, lymphamque, intermedia tamen glandula, in venam subclaviam expuentes. Neque aliter partium aliarum vascula lymphatica sese habere, com-

re, commemorato libro idem ille prædicat ; in quo quidem ipso ei cum *ἀντοψία* oculorumque iudicio Nic. Stenonis plane convenit. Nec vero ab his dissentit Princeps Anatomes, Marcellus Malpighius. Certum est, inquit, *conglobatis glandulis lymphatica vasa appendi, quæ cum ipsarum substantia intimum commercium habent, unde unicum lymphaticum minimas penetrat glandulas, & frequentissime multiplicia subintrant grandiores glandulas, ita ut ex his, quæ huc usque observare potui, asserere liceat, quamlibet conglobatam glandulam lymphaticis ditari.*

Obs. de muscul. & glandul.

Epist. ad

Reg. Soc.

& Angl. de

Structur.

gland. con-

glob. &c.

P. 5.

XVI.

Nam omnium huius generis glandularum commune est, ut præter arterias, venas, & nervos, duo lymphaticorum genera complectantur, evehens alterum, alterum invehens ; quorum hoc lympham ex partibus apportans, tam arcto arteriis vinculo commercioque est conjunctum, ut, inflata arteria, pariter lymphaticum glandulæ cujusdam spiritu distendatur, ejusque latex sanguineus interdum, & loturæ carnis instar, appareat. Quibus argumentis adductus evictusque, quem prædiximus, Nuckius, prioris generis vasa lymphatica, quæ in partibus suis infixæ radicibus sunt, ab ipsis arteriarum furculis oriri, iisdemque continuari censuit. Atque hi quidem lymphæ ductus, ab ultimis fontibus illis profecti, in pluraque divisi brachia, numerosa furculorum propagine gibbum glandulæ ingrediuntur, dum ex altera, & sima glandulæ ejusdem parte, nova vasa multiplicibus itidem radicibus prædeunt, quamque vehunt, lympham, non solum a partibus superioribus, capite, collo, brachiis, sed etiam ductus thoracici opera,

loc. cit.

loc. cit.

a partibus reliquis atque inferioribus refusam, sanguini tandem circa cavæ divaricationem reddunt, Nicolao Stenone, Nuckioque testibus. Interdum vero unum tantum vas lymphaticum glandis superficiei inhæret; at furculos tamen a latere in ea defigit. Nec tamen ductus lymphatici ubivis adeo una tantum fulciuntur glandula, quin potius a primis fontibus coepti, & glandulæ cuiuspiam inserti, ac novis inde radicibus egressi, in aliam glandulam propagentur. Sic enim Steno cum glandulam salivarem exteriori disquireret, ex tribus diversis conglobatis, parotide scilicet conglobata, maxillari inferiori apposita, & conglobata alia supra fauces ad extremas nares haud ita procul tonsilla sita, tres etiam separatos lymphaticorum ramos in gibbum glandulæ, quæ ab eo communis nomen traxit, deorsum disseminatos, ex hujusque concava parte quartum vas ad cavæ in jugularem axillaremque divaricationem esse missum, edoctus est. Sic etiam rivuli lymphatici, quorum nonnulli aortæ, atque iliacæ arteriæ, injuncti superstructique sunt, alii rursus e regione cavæ, & venæ iliacæ, finitimi ac contermini; utrique autem ab inferioribus partibus ducti, glandulam intrant; inde ex priori in secundam, aliquando in tertiam, immo vero in quartam sæpe feruntur, ac vel soli, vel anastomosi conjuncti, lympham suam in commune receptaculum evomunt; quemadmodum autor est idem.

*l. c. p. 41.**l. c. p. 72.**Nuckius.*

XVII.

Substantiam glandularum, de quibus agimus, ex vasorum capillarium nexu, ac implicatione, more
gland-

glandularum, quas conglomeratas vocant, conflari, multorum animos invasit opinio. Sed propius eam intuentibus fibrosa, & reticularis apparet. Exterius quidem duplici membrana convestiuntur; quarum interior densa valde, ac crassa est, & fibris carneis, in tenuia filamenta divisis, aliis directis, aliis in orbem ductis, & varie inter se implicitis, circumducitur, variorumque, quibus sanguis inclusus est, lateralibus ramis irrigatur. Intus autem plurimæ fibræ, itidem carneæ, cernuntur, huic membranæ ex transverso adjunctæ, eæque hoc ordine collocatæ, & prolatae, ut plurima & angusta intervalla, exiguaque spatia relinquunt, quæ succo lymphatico turgida plurimis, minimis, iisque rotundis tuberculis inæqualem glandulæ superficiem reddunt. Quæ autem has excipiunt, & interiora glandulæ subeunt, fibræ; eæ varios componunt angulos, alius quidem atque alius figuræ, & magnitudinis; ubivis tamen firmiter cohærentes, muscumque arboreum referentes; quamobrem etiam mucosæ a *Nuckio* appellantur. Ad quarum intelligentiam cum lumen facemque præferant, quæ nunquam satis digne laudandus *Malpighius* habet, *fa-loc, cit.* cere non possum, quin eadem capitulatim commemorem. Is enim facta glandulæ per longum dissectione, diuturnaue ejusdem aqua vulgari maceratione, diligenti indagine observavit: Ab ambiente, densa satis fibrosaue membrana, fibras, quas diximus, carneas per transversum emergere, & sibi oblique occurrentes, in osculatione lacertorum, vel saltem implicatione, multiplices & pene innumeras retis areas effingere, quæ subrotundæ sint, quandoque angu-

angulares, & magnitudine dispares : In medio autem cujuscunque areæ locari loculum, sive folliculum glandulosum, qui ovali, vel sphærica constans figura, & ex majori minorique humoris contenti copia, amplior, vel contractior sit, eoq; exinanito, in seipsum collabatur, persimilisque sit lienis glandulis : Ac porro præter vasa sanguifera supra fibrarum carnearum fasciculos excurrentia, nervos quoque glandulam intrare, atque adeo totum illius corpus e variis filamentis retis instar contextum esse, quorum tamen plurima sint portiones fibrarum carnearum atque laciniatæ membranæ, quæ exterius universam tegit glandulam.

XIIX.

Ex quo cuivis intellectu est, harum glandularum contextum reticulatum fibris motricibus instructum esse, ac musculosum. Ut conjecturam faciamus liceat, ductibus lymphaticis hæc interjici organa, veluti machinas quasdam hydraulicas, & officinas lymphæ, ut particulæ chylosi laticis, reti similes earum angustias pervadentis, motu systaltico & compressivo fibrarum muscularium tritæ concussæque, in plura minima, minusve continua, frustula dividantur, & gelatinosæ pinguesque moleculæ, implicitæ adhuc & colligatæ, aut ad nexum saltem proclives, in novos motus concitatæ, ex se ipsis extricentur, ac divellantur, quo pristinis vinculis solutæ, & sui quæque juris effectæ, liberrimo inter se motu volvi provolvique possint, & promptiores ad secedendum fiant. Cui rei præclaro est argumento, quod lymphæ, quæ aliquantum adhuc lactescens glandulis infun-

infundebatur, ab iisdem diaphana magis redeat, & gelatina adeo non spoliata, ut hæc magis evoluta, ac pellucida cernatur, i. e. ut, quæ in chylo parum manifesta fuit, in lymphâ postea reddatur conspicua, notante clarissimo Bobnio.

l. c. progymn.

13. p. 191.

XIX.

Sanguinis conqvassationem, quæ motu cordis perficitur, memorant viri celeberrimi, Georg. VVolfsg. VVedelius, & Richard. Lovverus; quorum ille: *Sanguinis*, inquit, *in corde motus nihil aliud esse videtur, quam con-* quassatio quædam continua, ut partes heterogeneæ dispositionem nanciscantur, debitis locis secernantur, & purus sanguis arteriosus ad partes veniat. Fingamus, lac devehi ab arteriis, & revehi a venis, sive ductibus, & canalibus similibus infusum, nunquam inde separabuntur partes reliquæ, nisi conqvassatio, atque concussio accedat. Circulatio enim (pergit idem) ut circulatio, sanguinem non reddit aptum ad segregandas particulas; sed has aptas redditas ad excretiva loca devehit, quo facto, quodlibet loco proprio excernendum deponitur, & transcolatur. Magna vero sententia, & præstanti viri ingenio digna; quam postea quoque alibi inculcat. Neque enim negaverit quisquam, quicumque ad cordis machinam animum attenderit, ejus motu divisionem, ac solutionem minimorum sanguinis egregie perfici. Mihi, ne quid dissimulem, glandulæ conglobatæ veluti totidem corcula videntur, pelliculis suis laciniatis, & muscularibus, reticulatum glandularum contextum undique colligantibus, chylum, vel lympham transeuntem, preli instar conqvassantia, & paulatim per radículas, & ramulos

Ephem. phys. med. Dec. 1.

Ann. VI. obs. 2.

Tr. de corde c. 2.

Physiol. reform. p. 275.

D

capil-

capillares in evehentes lymphæ tubos exprimentia. In quibus quidem tubulis frequentissimæ occurrunt valvulæ, fibris suis motricibus, ab una in oppositam partem ductis, quibus contrahi possint, rursumque relaxari, pariter instructæ, ut, tanquam totidem exigui muscoli, primi impellentis motum continuent, & reliquæ lymphæ perfectioni opem ferant. Idem humoribus, pulmones transgredientibus, usu venit, cum aer per tracheæ bronchias in vesiculas illapsus, rursusque egressus, vasa pneumonica modo comprimit, modo laxat, ictibusque repetitis pulsatur, & concutit. Nam quo sæpius humores contractione partium, quas peragrant, agitantur; hoc magis obterantur earum particulae, ac dissolvantur necesse est. Cujus rei illustre satis exemplum glandula illa sangvineæ (lien, puta) præbet; cujus fibrosam, retiformem, ac musculosam texturam quæ pervagatur sanguis: is in complures, multo minores, particulas ita conteritur, ac diminuitur, ut fluidissimus, coccineoque colore rutilans, ex eodem ad hepar deferatur, ad discessum materiæ biliosæ maturandum.

XX.

His igitur viis chylus circulationis obiens motum, ad easque partes, quibus absolvitur, identidem revertens, lenta sua commutatione in succum, naturæ genio familiarem, ac gratum, vertit; ac demum in limpidam, crystallinamque lympham perpurgatur; utpote quam ex gelatinosis, aqueisque particulis, utrisque minutatim divisis, compositam, materiam esse imprimis idoneam, quæ in succum corporis nutri-

nutricium abeat, argumento, haud parum probabili, plerique Medicorum contendunt. Quod cum in dubium vix vocari posse videatur, illud saltem nunc in disceptationem cadit: illane lymphæ alibilis portio, cum humoribus ceteris permixta, per arterias, an juncta ab iis per nervos ad partes devehatur, quo refectioni earum serviat, cum alia vasa haud adsint, quibus id negotii queat dari? In qua opinionum disensione ut, quid propius fidem sit, intelligatur, non alienum erit hoc loco, unum, itemque alterum audire argumentum, quod alterutram sententiam vel firmare, ac constabilire, vel convellere, atque abjicere videatur. Atque ut inde exordiar, constat inter omnes, sic cum nutricium elaboratiorem, a sordibusque repurgatum esse debere, & segregatum a particulis, accretioni ineptis, antequam nutriendo corpori impendatur. Id quod de lymphâ dicere non auserim, cum pro certo habeam, eam purgamentis variis semper onustam per arterias ad partes commeari, magnamque sui phlegmatis copiam, pluribus crassis, terræ, salis, sulphurisque partibus imbutam, in renibus, cute, hepate, membrana pituitaria, & multiplici partium aliarum colo, perpetuo abjicere. Ut vix probabile videatur, per easdem vias alimenta pariter ad partes traduci, & sanguinis excrementa expelli: quippe cum munus ejiciendi excrementa arteriæ, utile æque, atque inutile, vehentes, sustineant. Accedit hæc, quod chylus constanti vectigali massam sanguineam, perpetuo deficientem, atque exhaustam, instaurat, recensque quotidie venis instillatur ante,

D 2

quam

quam superior perpurgari satis, conficique possit. Chylum enim sanguineæ confusum massæ, naturam, & indolem suam, tam subito non exuere, ut albedinem una cum excrementis statim relinquat, quin potius multo satis spatio, pluribusque horis crudus omnino, & lacti similis, cum illa corpus circueat, incisa, aliquot a pastu horis, vena experimur; in qua quidem plurimum feri lactescentis, atque ejusdem sæpe odoris, saporisque, cujus fuerat cibus, sanguini innatare conspicitur. Ac si recte naturæ consulti observant, in plantis, quæ, defixis in terra radicibus, tenuem, ac puriorem succum aeris circumfusi pondere, ac elaterio excipiunt, atque adeo visceribus, chylum elaborantibus, haud indigent: succum tamen illum intra sinus quosdam, quos utriculos vocant, prius collectum, per alios deinde, eosdemque angustos ductus, & fibrulas, quasi per filtrum trajici, ac percolari, eademque percolandi ratione tenuiores, sinceræque particulas, nutritioni aptas, ab aliis crassioribus, & ineptis segregari; & ejectis per poros detrimæntis, repurgatas, per fibras demum alias, & interiores in truncum emergere; atque hinc in ramos, & folia, quo omnes plantæ partes alant, adscendere; quodque ejus melioris succi est reliquum, per alias fibras ab ipsa radice, sui alendæ causa, resorberi: quanto, quæso, majori cura, atque industria succus nutriticius in animantibus præparabitur, ut purus, expersque mali, per ductus proprios ad partes corporis provehatur.

XXI.

Neque vero apparet, quæ eadem partes, quæ lympham expurgant, eandem quoque in suam convertere naturam possint, præsertim cum expendimus rapidum, ac citatum cursum, quem sanguis per arterias in venas dirigit. In quam quidem sententiam scite Lobverus: *Quam celeri autem passu, inquit, sanguis omnis a corde per totum corpus trajicitur, non aliunde facilius est concipere, quam ex seri cum eo mixti citissimo per renes decursu. Quippe cum duæ, vel tres libræ cerevisiæ, matutino haustu in ventrem demissæ, intra semiboram fere totæ, & citius multo, si frigida tempestas fuerit, a vesica iterum reddantur; & cum serum illud plerumque dimidiata tantum sanguinis, in renes delati, pars fuerit, quidni asserere fas sit, quatuor, vel sex libras sanguinis, sero diluti, per duas arterias emulgentes (ut vocant) in renes a corde transmitti. Si autem per vasa tam parva, si cum reliquis conferantur, tanta liquoris sanguinei copia tantillo spatio pertransseat, haud arduum erit intelligere, quam concitato motu reliqua sanguinis massa omnis in ceteris partibus corporis feratur &c. Neque enim alius a ventriculo, & intestinis, liquori cuilibet, nisi per cor & sanguinem, in renes & vesicam transitus, aut via a natura conceditur; si autem tanta aquæ copia (qua, ut prius dictum, dimidiata tantum sanguinis, in renes delati, portio est) tam exiguo temporis, & per tam exiles arterias pertransseat, quid de reliqui sanguinis transitu per vasa omnia majora existimandum est? Hactenus Lobverus. Cui accedit Bellini, qui Anatomen docere tradit, quid de* *l. c. cap. 3.*

tempore illo, quo aquæ diureticæ reddantur, quodque compluribus perexiguum, & longe brevius vi-

deatur, quam ut suffecerit excursioni ordinariæ per vias lacteas; existimandum sit, & quam perbrevis temporis spatium, ac longe angustiori, quam quo reapse effluant, per ductus lactearum, & circuitum sanguinis ex intestinis sex, octo, duodecim, pluresve aquæ libræ ad renes deduci possint. Quo quidem transitu sanguinis per vasa renum, quæque secretionem lotii ipsos quoque renes nutriri, non temere persuadebimur, quia nutritio quiete, atque accretione particularum perficitur, cui in tam rapido torrente nullus videtur locus esse. Impellitur enim circulus sanguinis continuato filo, & citato cursu, cum cordis ventriculi nullam, sub sensu cadentem, capiant quietem, sed singulis pulsibus sanguinem in arterias extrudant; hic autem compelli in eas nequeat, quin, a tergo insequens, universum ejus flumen totum genus arteriosum, & venosum inundet. Adde, quod quibusdam in partibus non nisi incommodæ, atque effœtæ particulæ extra arterias in poros, ductusque excretorios dimittuntur. Haud enim, opinor, recto deerravero, si arteriarum surculos venulis utriusque generis, porisque partium excretoriis, propagari dixerò. Idem exemplo eorundem renum demonstratu facile est, quorum arteriæ, ac venæ, in ductus capillares desinentes, cum ipsis tubulis, ex quibus conflata est renum substantia, eam inter se communitatem habent, ut inflata arteria, venæ sanguiferæ pariter, & lymphaticæ, mox distendantur, aerque, ureteri inditus & arterias, & venas illas succedat. Id quod jam dudum clarissimum *Borrichium* non fugit, cum inflata arteria cœliaca, vasa lymphatica pariter, ductumque

thorac-

thoracicum flatu distendi, observavit; ut apud *Th. Bartholinum* legimus. Quemadmodum etiam ada-
cta, syringis ope, in emulgentem, quam vocant, ar-
teriam aqua tepida, experimur; eam facili, expedito-
que itinere in venam conterminam, ac vasa lymphatica traduci, indeque continuato filo profilire; partim vero per ureterem refundi; & aquam intra viscerum aliorum arterias siphone impulsam, & venas, & vasa lymphatica, illigatis etiam illis, subire. Pari successus usu in arteriis aliis, v. g. crurali evenire intelligimus, ut frigida quoque, ab ea excepta, per truncum venæ finitimæ promte celeriterque redeat; idque haud raro cum saltu, ut *CL. Bohnius* affirmat, *l. c. p. 109.*
Ex quo haud temere colligas, ab arteriis capillaribus venas utriusque generis, tam sangviferas, quam lymphaticas, atque omnes omnino corporis ductus, proficisci; nec veri præsidio tueri se posse, quæ in extremis vasorum, sanguinem vehentium, finibus interstitia, aut tubuli, corporaque cribriformia, a vasis sejuncta, ac distincta, vulgo collocantur. Quod si ita est, (ut quidem oculorum fides testatur, vasa minima cujuscunque partis retis instar esse, ex summis arteriis, & summis venis, sibi invicem continuis, composita; atque glandulas cerebri, hepatis, pancreatis, renum, & alias constat, quas organa secretoria humorum, atque spirituum esse volunt; nihil aliud esse, quam propagines arteriarum, & in hepate venæ portæ ramulos, in pororum anfractus convolutos, ulteriusque in ductus, breviores, longioresve abeuntes) nullo modo apparet, quæ, ut alias partes omittam, v. c. renibus arteriæ com-
mea-

meatum ministrare possint, cum necesse hoc pacto sit, alimentum una cum urina in renum tubulos dissipari. Neque enim est, quod existimes, partem quandam alibilem ab urina digredi, in tubulorumque renalium interstitia rejici. Nam minus videtur, probabile, illam lotii percolationem alibilis etiam succi alienationem, ac disjunctionem consequi, præsertim cum nullæ ex arteriis ad ea intervalla viæ pateant, in illaque sanguinis præcipitante per vasa incitatione major omnino lymphæ vis, ac copia alioqui resideret, quam pro nutritione renum; cui quidem nullus ad venas reditus esset, quando venas utriusque generis ex arteriis recurvis propagari, edita rei experimenta videntur confirmare.

XXII.

l. c. p. 107. Qua quidem sententia firmis rationum viribus innixa, vix esse videtur, quod verearis cum CL. *Boh-
nio*, ut disjunctioni, atque secretioni humorum ulli in partibus locus detur, cum ea, quæ diximus, sola quævis impedimenta, illi corporis actioni objecta, amoliantur, & tam claram rei lucem afferant, ut præterquam, quod ea vasorum continuatio multis in partibus ipsis sensibus exposita est; idem quoque illustre det indicium, ac documentum, opinionem nostram rei respondere, cum effector naturæ haud dubie commodissima, & simplicissima fabricandi ratione, machinam construxerit, nullis ambagibus supervacaneis, quas perfectio ejus, numeris omnibus absoluta, nunquam esset receptura. Nam secretionis animalis negotium totum a motu sanguinis intestino, ejusque

que circuitione, ac diverso, secundum diversum tubulorum, ab arteriis orientium, situm ac diametrum, decursu pendet; propterea quod idem motus, quo sanguis omnis globulis, indole moleculaque variis, agitur, per tubum arteriæ derivari potest, eundem longius queat provehere per ductus alios, arteriæ conjunctos, quorumque alter tubum arteriæ rectâ excipiat, quo pertinent venæ; alter ex utriusque angulo egrediatur, ac emissarius sit, sive secretorius. Cum n. sanguis non solum per longitudinem arteriarum progrediatur, sed & motu suo expansivo, vique sua elastica, quaqua-
versum in latera arteriarum connitatur; id quidem facile liquet, partem quandam liquidi debere exprimi, quâ ostium ductus cujusdam excretorii patet, eamque vi sanguinis, partem sui in ostium impellentis, ab elaterio agentis intus aeris, & systole cordis, atque arteriarum illata. Ad quam quidem sententiam accedit CL. Bellini, dum Lectorem ita docet: *Se-* *loc. cit.*
*paratio, ac derivatio inequaliter liquidorum, per canales corporis mistim fluentium, sit per compositionem duorum motuum, quorum alter movet per longitudinem canalibus, alter eodem tempore quaqua-
versum per latera.*

XXIII.

Quæ vero in contrariam sententiam experimenta commemorantur: Aquam arteriæ v. g. brachii, immisam, per venam non redire, nisi omnes manus, & brachii partes aqua illa intumescant; itemque ceram liquefactam, ac diversiccolorem, arteriæ venæque sociis, injectam, conjunctos earum fines haud ostendere; iis quidem facili, quantum intelligo, negotio

confulitur. Neque enim transire ex trunco arteriæ in truncum venæ sociæ liquor potest, nisi prius omnia eorum capillaria vasa sit pervagatus. Quorum cum innumerabilis in illis partibus existat copia; quippe cum nec areolam quidem in cute, vel musculo, videre liceat, in qua non arteriæ, venæque insint: necesse est, eas partes, liquore injecto, nonnihil intumescere, ac redire deinceps liquorem per venam, eundemque exultantem, ut supra ostendimus. Quod profecto (emigrante e vasis liquore in interstitia, spatiaque intermedia, aut tubulos musculorum, ut nunc plerisque visum est) ob impeditos in defunctis meatus, minus contingeret. Ac cum ab infusa in arterias aqua, cruor omnis e vasis, per fibras motrices musculorum serpentibus, eluatur, atque abstergatur: non est mirandum, si muscoli albicantes reddantur; neque existimandum, ex ipsis fibris, vel interstitiis earum, quæ nunquam ingressus est, cruorem elui. Nam illud sensus, microscopio adjuti, fide satis probatur, quamque fibrarum carnearum, quibus muscoli constant, e pluribus exiguis filamentis, ac veluti cylindrulis, substantia quadam medullosa, & liquore pellucente turgidulis, compositam esse; at magno numero sibi invicem incumbentes ab intensa sanguinis rubedine, vascula sua penetrante, mutuatitium colorem habere, ac sanguineas apparere, cum illis in locis, ubi rarius sunt satæ, pallidiores, atque pellucidæ videantur. Injectam vero per arterias, venasve ceram diversicolem, & harum valvulas, & capillarium vasorum angustias, impedire, quo minus eas-

easdem intrare ac peragraré queat, facile est iudicium. Quod autem ad discrimen inter sanguinem arteriosum, atque illum in venis fluentem, ex sectique musculi valis missum, attinet, quod quibusdam aliis obstare videtur; illud tantum non esse, quantum vulgo creditur, nec a transitu sanguinis per interstitia musculorum, sed a majori tantum vi elastica, ab impulsuque cordis, atque arteriarum, & segregata lymphæ parte proficisci, pervulgatum satis, & contritum est. Adhæc, si sanguis, vasa sua egressus, villos musculorum incurSAT, ab eoque, cum liquore nerveo permixto, motus illorum pendet; quid tandem causæ est, quamobrem ille in cursu suo, atque itinere per muscululos, qui diu tensi satis, atque contracti manent, aut pro diversa corporis agitatione diversimode distenduntur juxta ac contrahuntur, atque adeo diversas figuras effingunt; non impediatur, sed recto itinere ex arteriis in venas contendat, & pari semper passu, siue moveantur, siue quiescant musculi, ambulet? Quisque demum fit, ut, quo tempore musculi moventur, eodem reddantur exangues, & expallescant; toti vero rubeant, cum a motu remittuntur, atque otiantur? Id quod de corde in vulgus notius est, quam dici necesse sit.

XXIV.

Sed ut e diverticulo redeamus in viam, qua deferendi occasione invitati paulum decessimus; nolo hoc loco accumulare, quæ de succo nervorum a clarissimis Britannicæ Medicis sunt disputata, cum illud monuero extremum, quod omnes, animis sententiisque conjuncti, existimant, sine accessione, per ner-

vos facta, nullam nutriendi vim esse. Id quod in membris paralyticis, ob nervos obstructos, constri- ctos, aut præcisos liquido admodum apparet; tam- etsi justam gravemque ejus phænomeni causam ne- mo dum, quem intellexerim, aut sciam, exposue- rit. In quam quidem sententiam e multis, præ- stantibus ingenio viris, laudasse suffecerit CL.

l. c. p. 123.

Bobnium. Quia nihilominus, inquit, spirituum a- nimalium confluxus ad partes interclusus mox atro- phiam comitem habet, adeoque sine cerebri, & nervosi generis adjutorio nutritio frustratur, ut in paralyti, nervis præsectis, aut alias enormius læsis observamus, sanguine quam- vis cum succo suo alibili promte satis influente: disquiri meretur, an fluidum illud nerveum materialiter, an for- maliter tantum, concurrat? Nutrimenti passivi, seu mate- rialis vices ipsi concedere prohibet summa ejus, & sensus fu- giens, tenuitas, atque incoercibilitas, cujus intuitu ejus sub- stantix modus adhuc ambiguus est. Imo quamvis etiam succulentia quadam gaudeat, qualem diversi scriptores pro- nunciant, nullo tamen infallibili adhuc experimento demon- strarunt: quia nihilominus nonnisi exilissima hujus moles concipi valet, nihil etiam alimonia substantificæ sibi hinc promittent partes esurientes, & languentes, & per conse- quens influentiam ejus tantum formalem in negotio nutri- tionis suspicari fas est; qualem, bareo. Ex quo CL. viri candorem judices licet, quando vix ullus aliam ejus rei causam idoneam exquirere potuit. Equidem *Willisium* memini, succi nervosi, quasi fermenti cujus- dam spirituosius, opibus nutricandi negotium confici; hocque deficiente, aut depravato, impeditove, idem falli, ac perverti, existimasse. Sed jure, meritoque, pro- sum-

*Anat. ce-
rebr. c. 20.*

summa, atque exquisita doctrina, repugnat Vir Gene-^{Diff. pr.}
 rosus, maximeq; celebratus, decus, ac deliciæ nostræ, ^{publ. I. Tb. II.}
Georg. Francus a Frankenau. Nihilominus eandem senten-
 tiam amplectitur V. CL. *Raymundus Vieussens*, arbitratus, ^{Nevroproph.}
 laticem nerveum, activis præditum elementis, ubi hu- ^{univers. L. I.}
 mori nutricao, crassiori, ac hebeti, ab arteriis suggesto ^{15.}
 occurrat; eum spiritu suo animali, fermenti instar
 saturare, ac dissolvere, in minimasque partes divide-
 re, quæ a se invicem extricata corporibus, sibimet
 mensura exæqvatis adjungantur, naturamqve illo-
 rum induant. A quibus non alienus est *Jo. Alphons.* ^{De motu a-}
Borellus, succum nerveum formam, & facultatem ^{nimal. prop.}
 vitalem, & animasticam afferre partibus, sangvi- ^{200.}
 ne reparatis, judicans. Sed qui hæc cum nutritio-
 nis negotio contulerit, & sanguinis lymphæque con-
 stantem, atqve incitatum cursum diligenter æstima-
 verit; is vero nullo modo dederit, in ipsis demum
 partium nutriendarum finibus, & actu nutritionis,
 alimenti crassioris, ac hebetis divisionem, secretio-
 nemque a particulis, accretioni ineptis, fieri; cum
 nulla sanguini mora in partibus concedatur, & succus
 prorsus elaboratus, ac extenuat9, ejusq; particularum
 quies, & contactus mutuus, ac immediatus, secundum
 omnes superficies cum partibus alendis pascendisque
 ad nutritionem requiratur, atque adeo nullo alio a-
 ctivo principio, aut fermento spirituofo opus sit, ut-
 pote cujus motu disjici potius alimoniam partium
 est necesse. Nec vero rectius alii sentiunt, extincto
 partium sensu, ac motu, nutritionem languere; cum
 constet propter mollitiem, & laxitatem, five flacce-
 scentiam dilapsamq; villorum nerveorum, ac muscu-

l. c. p. 80. larium, sensu motuque privari partem posse, citra nutritionis dispendium, qva de re CL. Cole legi meretur. Aut igitur alia priori phænomeno assignanda ratio, aut detur oportet, nutrimum corporis succum non per arterias, sed per nervos apportari.

XXV.

His autem, qvi tenuitatem impedire succum nervorum volunt, qvo minus alimenti munus gerere, actueri qveat ; per sane opportune doctissimus *Apolog. pro Georg. Entius* respondet, his qvidem verbis : *Quid e-*
circuit. san- *nimi ? existimabimusne, nihil esse nutriendis partibus idone-*
gain. p. m. *um ; nisi quod, crassi glutinis instar, iisdem adherere possit ?*
129. Ita quidem videtur censuisse Galenus, L. 7. meth. med. c. 6. ubi ait : omnium, quas novimus, ciborum maxime nutriens caro suilla est : quæ glutinosum saccum crassumque generat. Nam nec alio esse habitu potest, quod in summo sit nutriens ; quippe adherere id debet, & firmiter affigi ; non autem præ tenuitate diffluere. Quemadmodum scil. (pergit Entius) parietes, ædesque magnorum lapidum congerie extruuntur. Pari fere ratione Huartus, ad memoria stabilimen, laudat anguillarum esum : quod scilicet viscosus cibus inuncandis, atque agglutinandis in cerebro objectorum speciebus, rerumque ideis, sit maxime accommodus. Attamen quercus, arborum firmissima, sola pluvia, ac rore, in vastam amplitudinem excrescit, atque in ævum durat. Hactenus Entius. Quo loco miramur, ad Galeni iudicium suam tacite, sententiam adscripsisse acutissimum alioqvi virum, *Theod. Craanium*, siquidem ejus fuerit opinionis, quam *de homine* *Tr. Posthumo* legimus. Enimvero tantum abest, ut alimenti tenuitas partium, modo molles fuerint illæ, ac roscidæ, nutritioni fraudi sit atqve incommodo ;
 ut e-

ut eam etiam ad hanc summe necessariam putem, existimemq; haud temere veteres humoris ejus attenuati, nomine roris, passim mentionem fecisse. Nam cum alimentum non extremis tantū oris affundi, sed interiora quoq; & spretas quasque partes pervadere, ad ossaque, atque ossium partes usque, adigi & perferri debeat, de sententia *Hippocratis*: id vero contritum *l. de alimen-* admodum, & fluxum sit oportet, quo atomos tenu-^{to.} issimæ cujusque partis, quasi quodam rore imbuere, ac reficere possit. Atque adeo minus est mirandum, cum alimentum per minutissimos distribui porulos debeat, illud, spirituosique liquoris more, oculorum obtutum interdum effugere. Ex quo satis superque apparet necessitas angustissimorum ductuum, quibus cerebrum, ac nervi constant. Cum enim tanta particularum subtilitate nutritio conficiatur; his quoque exiles duntaxat, cæcasque vias oportuit patere, quæ elaboratiores tantum, ac tenues lymphæ particulas admitterent; crassiores, infestas naturæ operibus futuras, excluderent. Quin & angustis adeo viis, cuniculisque opus est, ne rapido & effrenato motu, sed placido lenissimoque alveo, veluti succus plantarum alibilis per fibras earum fertur, ita nutritivus nostrorum corporum succus devehatur. Lenissimum enim hujusmodi motum tenuia corpuscula habere minime possunt, nisi pororum angustis coerceantur. Quem sedatum liquoris nervei motum ut sanguinis, e corde ejecti, impetus ne turbaret, Divinus Opifex aortæ truncum, qui cordi citimus est, tam affabre contextuit, ut sanguis in carotidem sinistram, quæ quidem ex ipso
aortæ

aortæ trunco, supremaque ejus parte ascendit; atque subclavias arterias, e quibus cervicales cum carotide dextra propagantur; non recto, sed itinere paulum flexuoso incurrat. Nam medio ventriculum inter & arterias istas spatium aorta, antequam in ramos illos explicatur, plurimum inflectitur. Quo fit, ut incurvatus iste angulus sanguinis ejecti impetum, & primum ictum sustineat, & præcipitantem ejus torrentem aortam versus descendentem dirigat, cum alioqui superiores ramos vehementius invaderet, eosque nimium distenderet, & impetu suo caput cito pessundaret; ut *Louverius* annotat. Idem sanguinis impetus plurimum frangitur, cum per tortuosos carotidum, os calvariæ subeuntium, ductus ad cerebrum contendit.

XXVI.

Utrum vero nutritius succus, quanta satis est, copia per nervos deferri possit, non dubitaverit cum *l.c. prop. 200. CL. Bohnio* atque *Borello*, quisquis animo reputaverit; facta cum universo corpore contentione, si non dimidiam, certe tertiam fere sanguinis partem in caput subvehi. Ubi cum ob visceris exilitatem nullo modo consumatur, valde probabile est, percolatum concreseibile serum per fibrulas cerebri, inde vero in elongatos nervos derivari; residuum autem, finibus re-collectum, adjunctis venis, iterum ad præcordia re-fundi, ut illustris *Malpighius* differit. Cujus dum extremum in hac dissertatione memini, funestum tanti viri casum hoc lugeo gravius, acerbiusque deploro, quo clarius medicinæ lumen in eo extinctum est. Ex quo argumen-
to ju-

*Exerc. epist.
de cerebr.
ad Carol.
Emcassat.*

to judicari possit, quamobrem initio caput proportionem ceteras partes superet, siquidem largiamur, e cerebro, tanquam promo condo nutricantis succi, stamina totius corporis sensim, & iusta serie, evolvi, atque augeri. Hinc enim omnis nervorum ordo descendit, & quotquot eorum sunt, variis propaginibus ulterius prolatis, in fibras, & membranas, quibus vasa, viscera, & muscoli, membraque alia constant, continuè diducuntur. Quam in rem commode *VVepferus*, senex usu rerum, & doctrina præstans, animadvertit: fibras ventriculi, & intestinorum, itemque cordis, atque omnium musculorum, nil nisi nervos esse, aut proxime certe ad illorum naturam accedere.

Certe si quis (illius verba sunt) persequatur cum solertia quadam nervos, musculos subeuntes, observabit, nerveas fibrillas ætissime uniri, & in unum corpus coalescere; & licet nervus, musculum transiens, non omnis in fibras illius impendatur: id tamen in vicinis musculis fit, atque eo usque progrediuntur, donec tandem in membranas, ad æquatum tactus organon, absumantur, hacque ratione terminentur.

Quod ne cui abiurdum videatur, propterea quod nervi corpora sint mollia, atque exilia, ob eamque rem tot fibras constituere non possint; memoria repetendum est, id quod oculis judicari potest, nervos ita corroborari maxime, ac convalescere, multisque locis ganglia adsciscere, ut longissime a cerebro digrediantur. Ac ne causa hæc verbis magis, quam experientia niti videatur, comperit idem, quem prædiximus, doctissimus *VVepferus*: fasciculum nervorum cruralium infra coxam in fibras, ventriculi, & intestinorum fibræ tenacitate, & firmitate nihil prorsus con-

*Neurograph
univers. pag.
242. seqq.*

cedentes, dirimi, atqve uti eæ in ventriculo, intestinis, corde, & musculis aliis, transversis fibrillis fuerint connexæ: ita quaslibet quoq; fibrarum istarū nervearum, more aliarum fibrarum, in minutissima filamenta discerpi potuisse, visamq; fuisse hoc majorem molem, & robur nervis accessisse, quo longius hi ab origine sua recesserint. Quo de argumento, quaque in primis ratione nervi in membranas, & fibras musculorum procurrant, ac explicentur, scite egit *CL. Raymund. VieusSENS.* Nec vero mirum, si nervi in fibras, multitudine infinitas, sparguntur, eodemq; prorsus modo, quo venæ, atq; arteriæ, imo pluribus propaginibus, quoquo versum per totam corporis molem ordinate, & quasi singulari quodam naturæ consilio, ramos diffundunt, ac explicant, in suasque quique partes abeunt; cum & radices eorum, cerebrum puta, ac cerebellum, totæ sint fibrosæ, nihilque aliud, quam filorum innumerabiliuna congeries, & fasciculi; idemque in plantis contingat, in quibus fibræ e trunco in ramos, & folia, fructusque tam numerosæ effunduntur, & sui generis nervos, carnesque componunt, ut pene fidem excedat, tantam fibrarum multitudinem, a trunco ipso potuisse prodire. Quapropter hominem, ut in proverbii consuetudinem abiit, minus incommode plantam inversam appellare possis, cujus radix (vel bulbus potius, ex quo omnia vitæ germina ortum suum ducunt) in altum erecta, in sublimique sita est; rami vero, quos brachia referunt, ac pedes, deorsum feruntur, ac terram spectant.

XXVII.

Majoris est momenti, disquiri, possitne nutritio,
sen-

sensus, ac motus, ab uno eodemque humore, per easdem vias delato, proficisci? Quod quidem a naturæ providentia minus abhorreret, illud indicio est, quod sine succo nerveo opus nutritionis non perficiatur, sensusque pariter obtorpeant, & motus opprimantur. Quare si verum est, quod supra significavimus, fluidum nervorum ex duum generum, partibus coaluisse: humidior altera, concretionisque capace; altera vero aerea, suaque explicandi vi prædita, sive elastica; nihil quidem impedire videtur, quo minus idem succus, & nutritionis, & sensus, & motus operibus aptus, atque idoneus videatur. Vi enim elastica aeris, rori nutricio interfusi, impelli, ac conjici in poros, itaque cuneari particulas nutritivas posse, ut firmiore contactu partibus nutriendis cohæreant, & copulentur, cuivis facile, est intellectu. Ut nullo glutine alio, aut forma, aut fermento, vel spiritu duce, & succi nutricii rectore, opus sit; cum non minus in plantis sit perspicuum, eas aere præcipue vigere, ac crescere. Quo fit, ut natura, quæ conclusis, compressisque exilibus pariter, atque elasticis corpusculis, motus suos efficit, lente quidem, segniterque agat; sed ea tamen cunctatione plurimum efficiat, & fluida corpora in solida, firma, durataque convertat. Quemadmodum experimur, teneras arborum radices, solidi, ingentisque ponderis marmoris commissuræ infixas, cum sine sensu succrescunt, atque attolluntur, tanta vi pollere, ut non fissuram modo dilatent, sed etiam, ingens illud pondus sublevent, & diruant. Neque enim alia hujus rei causa in promptu est, quam

placidissimus motus tenuissimarum partium elasticarum: quarum vi nutritiæ particulæ in radicis fistulas, porosque tacite invectæ, eandem alunt, & viribus paulatim suffectis, corroborant, nec maximo pondere, aut marmorea firmitate, impediuntur.

XXIIX.

Neque vero minus commode ab eodem succo aereo, intraque nervorum fibras compresso, atque adeo elastico, & villos musculorum inflandi, ac tendendi vi prædito, motus arcessitur; quum muscoli, quem omnis partium motus opificem esse constat, fabrica non aptius, quam cum congerie minimarum vesicularum, earumque spongiosarum, & sibi invicem contiguarum, ac cohærentium, quarum suas quæque complicaturas, sive inscriptiones, separatis intervallis distingvit; catenulæ instar, e pluribus annulis, meatibusque contextæ, ut citra dolorem tendi pariter ac remitti queant: neque ejus actio melius, quam cum inflatione, tensioneve illarum vesicularum ab intrusis liquoris nervei elaterio, quo totus earum fasciculus, sive musculus, turgidus redditur, ac tensus, comparari posse videatur. Quam quidem vim musculorum elasticam a sanguine, in vasculis illius circumactis, permultum adjuvari, liquet. Id quod is blando suo, atque egregie temperato, quo partes omnes permulcet, & fovet, calore præstare videtur; quo quidem non solum contactos villorum, meatus, intra fixos, præscriptosque dilatandi fines continet, ac coercet; sed etiam elaterium, atque expansionem

panfionem spirularum aeris auget, ac confirmat, quo
facilius explicari, & villos, ac vesiculas musculorum,
possint inflare. Quemadmodum usus perdocuit,
aerem vi caloris dissolvi, in majusque spatium diffi-
pari; frigore contra compelli, in angustiasque addu-
ci. Quorsum experimentum, a *Stenone* editum, lumen
affert: cum animadverti liceat, animal, aorta de-
scendente constricta, partes averfas paralyticas a
tergo trahere; soluta vero ea, atque expedita, earun-
dem partium motum, usumque recuperare. Nec
dubium est, quin idcirco potissimum nervos vascu-
lis, sanguine repletis, instruxerit natura, ut calore,
vitali omnes perfunderentur, qui & pororum li-
bertatem defendat, & succi iter, cursumque tuea-
tur. Quum autem ille liquidi motus, & per sy-
stema nervorum in fibras motrices suscepta prote-
ctio, pacata admodum sit, ac tranquilla, nec vim in-
fitam, ac provehentem ulla laboris difficultate defa-
tiget: id præterea liquet, tantum abesse, ut acces-
sioni, conjunctionique partium eadem obsit, ut par-
ticulis etiam aditum in poros aperiat, receptumque
det, atque aggregatas arctius inter sese devinciat.
Contra quam vehementi agitatione corporis, aut
animi, vigiliis, doloribus item, ac stimulis, sive vio-
lentis nervosi, ac membranosi generis concussioni-
bus, nutritionem perverti, palam est. His enim
causis singulis magna quædam, ac vivida fluctua-
tio, & pressio, expressioque, sive exspiratio, ac dis-
sipatio elastici, & nutritii liquoris efficitur.

XXIX.

Extremum, quod ad sentiendi vim attinet, inter omnes fere, quantum intelligo, convenit: eam in cerebro procreari ex motu, in sensoriis primum concitato, ex iisque per nervos ad originem eorum ultimam delato; quamvis mente, ac cogitatione difficulter fere possis complecti, quâ injecta instrumento cuiusvis commotio, longos nervorum tractus transvecta, ad eorum stirpem, & commune sensorium traducatur. Sed cum pro certo habeatur, spirituum (si eo nomine delectemur,) in nervis actionem non immixtis radiis, sed irrigatione effici: id, mea quidem sententia, haud omnino infcite, per nervorum quendam tremorem, sive vibrationes, quas filamenta nervorum, tactu rerum objectarum compressa, ac resilientia, concipiunt, explicari posse videtur. Ad quem quidem tremorem commovendum moderata villorum tensio a succo nervorum elastico, omnes illorum poros placide replente, ac dilatante, requiritur. Hoc enim consequuntur, ut cujuslibet instrumenti mutationes, quas a movente re objecta, subeunt, sive vibrationes, suscipere, ad cerebrumque, iisdem conjunctum, propagare possint. Quæ ut variæ sunt, ac diversæ, ita pro sua quæque indole alias atque alias in mente cogitationes, ac perceptiones gignunt; idque ex lege consociationis, quam præpotens rerum architectus mentem inter corpusque intercedere voluit. Id si ita est, facile erit iudicium, quâ fiat, ut sensus, motusque per eundem nervum, eodem fere temporis articulo, fieri queant; quip-

quippe cum motus ab undis liquoris nervei, in fibras motrices expulsi, hasque inflantis, ac distendentis proficiscatur; sensus autem in vibrationibus villorum nervi compressorum, seseque restituentium, aut in alternis tensionibus, & restitutionibus eorundem villorum positus sit, ac consistat. Neque tamen per me stabit, quo minus sensum æque, ac motum, ab undis liquoris nervei, alterum quidem a recta, alterum vero a retro impulso liquido liceat repeti; quando concitatio undarum moderatam nervorum tensionem desiderat, neuterque horum in utramque partem motuum alteri manum injicit, cum ad motum liquoris nervei reflexum, quo sensus colligi efficique persuasum est, tremor saltem, quædamque particularum inter sese commotio, sufficiat: vicijus partes liquidi elastici posteriores premendo priores, eademque porro sibi proximas urgendo, impressionem, ab objecta re factam, continuato tremore ad cerebrum propagent, nihil impedito directo ejusdem liquidi cursu, & secessu in musculos, quo motum partium perfici volunt.

XXX.

Atque hæc fere sunt de sensu receptæ consuetudine scholarum sententiæ; quas tamen dissimulandum non est, suis subinde angustiis laborare, nec omnem rei propositæ mensuram ubiq; implere. Neque enim negari posse crediderim, quendam tactus sensum esse, qui cerebro, id est, communi sensuum regno, nullo modo pareat, ac subjiciatur. Quem fas sit, naturalem, & simplicem appellare, verbo magno Viri ingenio, in primis-
qve

Progymn. qve clari, *Tb. Cornel. Consentini*; sive inchoatum, qvum
posthum. de sensib p. 79. neqve ulla rei, qvæ sub sensus cadit, apprehensione,
 aut perceptione utatur, neqve ad ipsius sentientis co-
 gnitionem ullo modo perveniat. Quare existima-
 ri potest, quantum intersit inter hujus generis sen-
 sum, & perfectiorem illum, quo sentientes rerum,
 sensibus expositarum, occurrunt, præsentiamque
 intelligunt, & cogitatione complectuntur. Ut haud
 inepte, quicunque dixerit: alium esse sensum, quo
 sentiamus; alium, quo, nos sentire, percipiamus; per-
 fectum autem, numerisque absolutum omnibus sen-
 sum tum demum effici, qvum sentiens ad id, qvod sen-
 tit, cogitatione menteque incumbat. Sed tamen in
 arduis hujusmodi, ac interioribus, reconditisq; rebus,
 qvod probabilius inest, vel minus certe a ratione re-
 motum, qvandam veri speciem saltem præ se fert;
 & qvando rei, ad liquidum perductæ, pondus non
 habet, inflammat quidem, accenditque animos,
 veritatis studio ductos, ut relinquant naturam ho-
 minis, a sui que notitia ad effectoris sui cognitio-
 nem, atque admirationem, laudesque provehantur,
 qui tam exquisito artificii genere hanc confecerit la-
 bricam, non modo vita, ac spiritu præditam, sed etiam
 rationis participem; cujus præstantiam cogitatione
 assequi, nedum verbis digne exprimere, atque ora-
 tione exæquare, possit nemo. *Quare collaudo Te,
 Domine, & quoad possum, de prædico, quod mire me finxi-
 sti, atque admiranda construxisti opera; id quod
 memor, gratusque agnosco.*